

МЕСЯЦА ИУЛИЯ В 8-Й ДЕНЬ.

ПРАЗДНОВАНИЕ ПРЕСВЯТЕЙ ВЛАДЫЧИЦЕ НАШЕЙ БОГОРОДИЦЕ И ПРИСНОДЕВЕ
МАРИИ, РАДИ ЧУДОТВОРНЫХ ИКОНЫ ЕЯ, ИМЕНУЕМЫЯ КАЗАНСКАЯ

Уставися же сей праздник праздновати в царствующем граде Москве, избавления
ради от ляхов, в лето 7121 (1612 от Р.Х.).

Вечер, Блажен муж:

На Господи воззвах, поставим стихов 8, и поем стихиры, глас 4:

Подобен: Яко добля:

Яко прекрасная Слова палата, * и престол светоносивый, Богородице
Владычице, * сопрестольное Слово Отчее * во Твоих ложеснах вместила еси, * и
рождаши Свет незаходимый, * наше омрачение просветила еси, * леть змиину
отгнала еси * и тление потребила еси: * жизнь вечную миру даровала еси * Твоим
Рождеством, * врата рая отверзла еси, * и вся благая человеческому естеству даровала
еси. * Но и ныне Госпоже, * Твоими молитвами, * избавляй рабы Твоя от всех бед.

Яко велика сущи Царица и Мати, * на Небеси превысоких сил Царя, *
пречистыя Твоя руки простерши, * молебно за ны предстоиши, * и на земли яко
державная помощница, * божественною Твоею иконою, * и духом с Твоими рабы
пробываеши, * и весело спасаеши, * и избавляеши от всякия напасти * благочестно
Богородицу Тя исповедающия.

Яко златозарный рай, и место прекрасное и богопросвещенное, и древо святое,
Духом Святым осененное, вместилище Света невечерняго, Тебе ведущим, ясно
немерцающим Божественною лучею, Младенцем Твоим светиши всей твари: Егоже
молящи, Царице Богородице, спаси град Твой и люди, к Тебе прибегающия от всех
бед.

Яко порфирию царскою и виссом, * иконою Твоею, * и Твоего Сына
Богородице, * Церковь Божия просветившися, * красуется чудеса. * Днесь явлением
вся созывает праздновати, * паче сияния солнечнаго, * благодатию Святаго Духа
блистающим, * на болящих и недужных исцеления источники источающе, * и всем
дарующи богатую милость.

Ины стихиры, глас 8:

Высокий Царю непостижимый, * со Отцем седая на престоле * и Божественным
Духом: * благоволивый родитися на земли от Девы * неискусобрачныя Иисусе: *
ущедряя Твое создание, человеческое естество, * неизреченными добротами, *
приими Твоя Матере приносимыя Тебе за ны молитвы, * и не помяни беззаконий
наших, * но помилуй и спаси души наша, яко милосерд. [Дважды.]

Преклонив небеса Царь славы, * сниде обновити Адама, * преступлением всего
истлевшаго: * вселися в Тя Чистая Дево, * и родися, ключей девства не рушив, * и на
руках Твоих смирен Младенец, * Иже архангелов Царь ношашеся. * И ныне Твою
молитву приемлет, * и прошение Твое во всем исполняет Богородице, * яко Твой
Сын и Бог: * Емуже усердно молися, * да спасет души наша яко милосерд.

Паче скинии Моисеевы, * по образу небесному сотворенныя, * всю Тя Бог
освяти, Богородице, * Духом Святым: * весь вселився в Тя, всего человека оживи. *
Тем и Твоя икона, паче Аароня кивота, * наполнися благодати Божия, * и источает
освящение душам и телесем. * Ейже любезно покланяющеся, * просим от Тебе
великия милости, * да спасеши души наша, благословенная помощнице.

Слава, и ныне, глас 8:

Приидите возрадуемся * державней заступнице рода нашего, * Царице Богородице: * приидите к тихому Ея и чудному, * почитаемому ангелы, честному поклонимся образу: * дарует бо верным обильныя дары целебныя, * от неистоцимаго источника святыя иконы, * неоскудную благодать источающи: * тьмы избавляет нас искушений и бед, * и всякаго греха, * благочестно и богоприятно прославляющих, * и чтущих светлую и чудную Богоматере святую икону. * Тем воспевающе воззовем Первообразней: * радуйся любезная миру помощи, * во спасение душ наших.

Вход. Прокимен дне. И чтения три.

Бытия чтение. [Глава 28.]

Изыде Иаков от студенца клятвеннаго и иде в Харрань. И обрете место, и спа тамо: зайде бо солнце. И взят от камня места того и положи возглавие себе, и спа на месте оном. И сон виде: и се лествица утверждена на земли, еяже глава досязаше до небес, и ангели Божии восхождаху и низхождаху по ней. Господь же утверждашеся на ней и рече: Аз Бог Авраамов, отца твоего, и Бог Исааков, не бойся: земля, идеже ты спиши на ней, тебе дам ю и семени твоему. И будет семя твое, яко песок земный, и распространится на море, и ливу, и север, и на востоки, и возблагословятся о тебе вся колена земная, и о семени твоём. И се Аз с тобою, сохраняяй тя на всяком пути, аможе аще пойдеш, и возвращу тя в землю сию: яко не имам тебе оставить, дондеже сотворити Ми вся, елика глаголах тебе. И воста Иаков от сна своего, и рече: яко есть Господь на месте сем, аз же не ведех. И убося, и рече: яко страшно место сие; несть сие, но дом Божий, и сия врата Небесная.

Исхода чтение. [Глава 3.]

Моисей бяше пасый овцы Иофора, тестя своего, священника Мадямска, и гнаше овцы в пустыню; и прииде в гору Божию Хорив. Явися же ему ангел Господень в пламени огненне из купины; и видит, яко купина горит огнем, купина же не старает. Рече же Моисей: мимошед, увижду видение великое сие, яко не старает купина. Егда же виде Господь, яко приступает видети, воззва его Господь из купины, глаголя: Моисее, Моисее. Он же рече: что есть, Господи? Он же рече: не приближайся семо; изуй сапоги от ног твоих: место бо, на немже ты стоиши, земля свята есть.

Исхода чтение. [Глава 13.]

Обведе Бог люди путем, иже в пустыни, к Чермному морю: пятого же рода изыдоша сынове Израилевы от земли Египетския. И взя Моисей кости Иосифовы с собою, клятвою бо закая Иосиф сыны Израилевы, глаголя: присещением присетит вас Господь, и изнесете отсюду кости моя с собою. Воздвигшеся же сынове Израилевы от Сокхофа, ополчишася во Офоме при пустыни. Бог же вождаше их: в день убо столпом облачным показати им путь, нощию же столпом огненным светити им. И не оскуде столп облачный во дни, и столп огненный нощию пред всеми людьми.

На литии стихиры, глас 8:

Приидите, празднoлюбцы и постников сословие, * верою сошедшеся, * хвалебныя песни принесем Марии Приснодеве, * днесь бо наста светлое торжество, * явление честныя Ея иконы Иверския, * юже обстояще со страхом и любовию, воспоим Богородице: * радуйся, неисповедимая радости всем; * радуйся, образом Твоим святым нас просвещающая; * радуйся, всем похвало и утверждение; * радуйся, спасение душ наших.

Что Тя наречем, Богородице Дево: * столп ли огненный, * к вечному наследию нас ведущий; * стену ли крепкую, * яко православный род защищаеши; * стража ли неусыпна, * яко обитель Твою охраняеши и спасаеши. * Темже от належащих бед избавляеми, возопиим Владычице: * радуйся, благих виновная, известное христиан упование.

На литии стихиры, глас 2, самогласны:

Яко воистинну древняго кивота пречестнее, * егда Давид собрав чины ликовствоваше, * ныне Твоя, Богородице, икона: * ейже предстоят архиереев собори, * и с чинми ангел царие же и князи, * и все христоименитых людей множество, * достойно блажат Тя Матерь Божию, * и прославляют раболепно, и чувствуют и покланяются, * и молятся Тебе по Бозе: * да мир умириши в православии, * и царския скипетры утвердиши, * и спасеши от всех зол Твоя рабы, яко едина благословенная.

Предстоят Ти, Госпоже Богородице, * пред Твоим, Пречистая, образом, * архиереев сословие, * царие и князи, и вси людие, монаси и прости: * ведуще Тя воистинну помощницу сильну и непобедиму, * моления Тебе приносить от всея души подвизают, * и поущают на молитву к Богу, * требующе Твоя помощи, * да простреши богоносныя Твоя руки, * и умолиши за мир. * Вонми и услыши, Владычице, * и подаждь утешение рабом Твоим, * дондеже не одолеют ны грехи наши тяжкия и лютыя: * Твоя бо всегда требуем вси помощи.

Глас 8: **Первее** написавшейся Твоей иконе * евангельских таин благовестником, * и к Тебе Царице принесенней, * да усвоиши ту, и сильну соделаеши спасти чувствующия Тя, * порадовалася еси, * и яко сущи милостива, спасения нашего содетельница, * яко уста и глас иконе бывши, * якоже и Бога внегда зачинающе во чреве, * песнь воспела еси: * се от ныне ублажат Мя вси роди! * И на ту зрящи глагола еси со властью: * с сим образом благодать Моя и сила. * И мы истинно веруем, яко се рекла еси Госпоже, * сим образом с нами еси. Тем благоговейно предстояще, * покланяемся Тебе раби Твои, * посети ны Твоими матерними щедротами.

Глас 7: **Гора** еси великая и преславная, * паче горы Синайския, Богородице: * она бо не терпящи снигтия славы Божия * во образех и сенех, огнем возгарашеся, * и громи и молнии тамо быша. * Ты же, весь Божественный огонь сущь, * Божие Слово во чреве Твоем неопально носила еси, * и от сосец Твоих млеко питала еси, * манием носящаго вся. * И ныне матернее дерзновение к Нему имущи, помози, Владычице, * верно празднующим Твой честный праздник, * и не забуди милостивно посещающе: * прияла бо еси от Бога дар строити * и покрывати христоименитое стадо, * рабы Твоя.

Слава, и ныне, глас 6:

Тебе вси роди человечестии * хвальныя дары приносят, Владычице, * и молятся яко Царице и Матери Божии: * пророцы Тя премудро проповедаша, * левити благословиша, * апостоли и мученицы исповедаша, * царие и князи поклоняются, * архиерее проповедают, * монаси и простии благоговоят, * богатии и убозии, * сироты и вдовы, * и всяк возраст, и всяко преспеяние, * старческое и младенческое, * под кров Твой державный с верою прибегаем: * покрый и соблюди, Госпоже, * молитвами Твоими, * и спаси от бед души наша.

На стиховне стихиры, глас 2:

Вместилище чистое Света пречистаго Богородице, * како Тя раби достойно воспевает? * Яко явлением пречистыя Твоея иконы, * и Превечнаго Младенца, * вся освящаеши.

Стих: Помяну имя Твое во всяком роде и роде.

О Дево нескверная, богорадованная, * что Ти когда таково благодарение принесем, * яко блаженнаго Твоего Рождества * всесияющею лучею всех * от тления к жизни возвела еси?

Стих: Слыши Дщи и виждь, и приклони ухо Твое.

О Дево Госпоже, * Мати Зиждителева, * небесных еси чинов радование, * и человеческому роду благословенная помощнице! * Моли о спасении душ наших.

Слава, и ныне, глас 5:

Воспоем людие светло Давидскую песнь, * Отроковице Невесте Божии, * и Матери Царя Христа: * предста Царица одесную Тебе Владыко, * рясны златыми одяна, * и преукрашена божественными благолепотами. * Сию убо яко избранную и добрую в женах, * паче всего мира удобрив, * благоволил еси родитися * из Нея великия ради милости: * и Сию помощницу людем Твоим даровал еси, * спасати и покрывати от бед, * всемогущею Твоею и Божественною силою, * Еяже молитвами Христе Боже помилуй нас.

Тропарь, глас 4:

Заступнице усердная, Мати Господа Вышняго, * за всех молиши Сына Твоего Христа Бога нашего, * и всем твориши спастися, * в державный Твой покров прибегающим. * Всех нас заступи о Госпоже Царице и Владычице, * иже в напастех и скорбех, * и в болезнх обремененных грехи многими, * предстоящих и молящихся Тебе умиленною душею, * и сокрушенным сердцем, * пред пречистым Твоим образом со слезами, * и невозвратно надежду имущих на Тя избавления всех зол, * всем полезная даруй, * и вся спаси Богородице Дево: * Ты бо еси божественный покров рабом Твоим.

НА УТРЕНИ,

На Бог Господь, тропарь, глас 4:

Заступнице усердная, Мати Господа Вышняго, * за всех молиши Сына Твоего Христа Бога нашего, * и всем твориши спастися, * в державный Твой покров прибегающим. * Всех нас заступи о Госпоже Царице и Владычице, * иже в напастех и скорбех, * и в болезнях обремененных грехи многими, * предстоящих и молящихся Тебе умиленною душею, * и сокрушенным сердцем, * пред пречистым Твоим образом со слезами, * и невозвратно надежду имущих на Тя избавления всех зол, всем полезная даруй, * и вся спаси Богородице Дево: * Ты бо еси божественный покров рабом Твоим. [Трижды]

По 1-м стихословии седален, глас 3:

Людие благочестивии, * правовернии собори христоименитии, * приступите верно вси, * божественному припадающе Божия Матере образу: * Тая бо исцеление болящим радостно подает, * уязвляет же злославныя яко стрела от лука, * нас всех веселит световидно, * и благодатию озаряет молитвами Своими.

Слава, и ныне:

Всю Тя Бог освяти Деву добрую, * и непорочную в женах, пророки прообразив честно, * иереи благословив, во святая святых всели, * ангелом воспита, с небесе пищу хлеб подая. * Сам же Преплагий, и Единородное Бог Слово, * вселися в Тя, и плотию пройде из Тебе. * Темже Ти поклоняемся, и чтим, * яко воистинну истинную сущую Богородицу.

По 2-м стихословии седален, глас 4:

Да ликовствует светло верных все множество, * рыдает же демонское воинство, * видяще многоименныя сияюща праздники Божия Матере, * ублажаему Божию Матерь божественными песньми: * идеже бо богоприятно славится * преблагословенная Богородица Владычица, * богоизбранная Отроковица, * неприязни падение, * христианом же крепкое утверждение.

Слава, и ныне:

О всеблагословенная Богородице Владычице, * богоизбранная Отроковице, * светлое пророческое сбытие, * апостольская похвало, * и мученическое исповедание и венче, * ангелы чтимая, и человеческими роды многопетая, * и всего мира вожденная помощница! * Избави рабы Твоя осуждения будущего, * и езера огненнаго, * едина благословенная.

По полиелеи седален, глас 1:

Правоверно чтущия Тя, * и императора к Тебе прибегающа, * и иконе Твоей святей любезно поклоняющася, * о Божия Мати! * Спаси, и не даждь в расхищение сопостатом: * ниже найдут на ны вся злая, * яже грехи наша уготоваша нам, * ниже беззакония наша превзыдут на главы наша: * но да Твоя матерняя к Богу преодолее * за ны богоприятная молитва.

Слава, и ныне:

Пречистая Твоя икона, Богородице Дево, * врачество всему миру духовное: * к нейже прибегающе, * Тебе поклоняемся, и почитаем, и лобызаем, и чтим, * исцелений благодать почерпающе от нея, * и недуг телесных, и душевных страстей, * Твоими молитвами свободяемся.

Степенна, глас 4. Антифон 1-й, ихже стихи повторяюще поем:

От юности моя * мнози борют мя страсти, * но Сам мя заступи, * и спаси Спасе мой.

Ненавидящии Сиона, * посрамитесь от Господа, * яко трава бо огнем * будете изсохше.

Слава: Святым Духом * всяка душа живится, * и чистотою возвышается, * светлеется Троическим Единством священнотайне.

И ныне, тойже.

Прокимен, глас 4:

Помяну Имя Твое во всяком роде и роде.

Стих: Отрыгну сердце мое слово благо.

Всякое дыхание да хвалит Господа.

Стих: Хвалите Бога во святых Его:

Евангелие Луки, зачало 4.

Во дни оны, воставши, Мариам, иде в горняя со тпцанием, во град Иудов. И вниде в дом Захариин, и целова Елисавет. И бысть яко услыша Елисавет целование Мариино, възграся младенец во чреве ея, и исполнися Духа Свята Елисавет. И возопи гласом велиим, и рече: благословена Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть глас целования Твоего во ушию моею, възграся младенец radoщами во чреве моем. И блаженна Веровавшая, яко будет совершение глаголаным Ей от Господа. И рече Мариам: величит душа Моя Господа, и возрадовася дух Мой о Бозе Спасе Моим. Яко призре на смирение Рабы Своея, се бо, отныне ублажат Мя вси роди. Яко сотвори Мне величие Сильный, и свято имя Его. Пребысть же Мариамъ с нею яко три месяцы, и возвратися в дом Свой.

По 50-м псалме стихира,

Глас 8:

Приидите возрадуемся державней заступнице рода нашего, * Царице Богородице: * приидите к тихому Ея и чудному, * почитаемому ангелы, честному поклонимся образу: * дарует бо верным обильныя дары целебныя, * от неистоцимаго источника святых иконы, * неоскудную благодать источаючи: * тьмы избавляет нас искушений и бед, * и всякаго греха, благочестно и богоприятно прославляющих, * и чтущих светлую и чудную Богоматере святую икону. * Тем воспевающе воззовем Первообразней: * радуйся любезная миру помощи, * во спасение душ наших.

Канон Пресвятей Богородице, Одигитрию, со ирмосом на 6.

Творение иеромонаха Игнатия. Глас 4.

Песнь 1.

Ирмос: Отверзу уста моя, * и наполнятся Духа, и слово отрыгну Царице Матери, * и явлюся светло торжествуя, * и воспою радуясь Тоя чудеса.

Радостно, Чистая, ныне наставшее хваление приношаю радуясь и тихим гласом, Одигитрие, воию Ти: радуйся, и исполни мя разума, пети начинающа.

Христа родившая, радость нам вечную, о радуйся всепетая, православных надеждо, Одигитрие всепетая Девице: радости исполни мя миру желанныя.

Ликуют вси человецы, и ангели всегда согласно вопиюще, на небеси и на земли Одигитрие: радуйся, Девице, радости бо Рождеством Твоим всяческая исполнила еси.

Радость Одигитрие, со страхом Ти вопиющих радости сподоби, Мати сущия радости, избавляющи скорбей всяческих, и всех помилуй к Тебе прибегающих.

Ин канон праздника на 8, глас тойже.

Песнь 1.

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся светло торжествуя, * и воспою радуяся Тоя чудеса.

Благоговеют Ти, Богородице, ангелов начальницы, и святых чини честно служат, праведнии красуются, небесных ходатаицу блажат Тя. Купно же и земля и небо в веселии светло восхваляют Тя, и мы грешнии милости просим: озари наша сердца, Владычице, воспети песнь святя Твоя иконы явлению.

Приидите, соберитесь христоименитии людие, умы тайно очистившеся, во святую церковь Матере Христа Бога нашего: источает бо нам неоскудно от святя иконы источник духовен, целебен душам и телом, песнь вопиющим: благословен из Тебе рождейся Бог наш.

Дивит, Пренепорочная, и ужасает всяк слух странно чудо Божественнаго Твоего Рождества: како херувимскаго Творца зачала еси? Какое огонь нестерпимый во утробе носила еси? Какую сущую Жизнь плотную облекла еси, и живот всему миру родила еси, Бога купно и Человека?

Под кров Твой Дево, Госпоже, прибегаем вси роди человечестии: просвети ны светом Рождества Твоего, грешныя рабы Твоя, молящияся прилежно, и кланяющияся пречистой Твоей иконе, просяще от Тебе прияти великия милости.

Катавасия: Отверзу уста моя, * и наполнятся Духа, * и слово отрыгну Царице Матери, * и явлюся светло торжествуя, * и воспою радуяся Тоя чудеса.

Песнь 3.

Ирмос: Твоя песнословцы Богородице, * живый и независтный источнике, * лик себе совокупльшия, духовно утверди, * в божественней Твоей славе * венцев славы сподоби.

Христа Вышняго Царя, о радуйся, непоколебимая Чистая, и одушевленная палато! Радуйся Одигитрие, радуйся: Тобою бо нерушимь наш град сохраняется.

Вместити Егоже не возможе тварь, во утробу неискусобрачную, Одигитрие Девице, телесно вместила еси: темже Ти радуйся поем, по долгу величающе.

Радость многопетая миру, радостно Ти поюще присно, вечнуюющая, Чистая, радости сподобляемся, Твоими матерними молитвами к Рождшемуся из Тебе, Одигитрие.

Златую Тя стамну, и свещник, и жезл, и трапезу, Чистая, призываем Одигитрие: и глас еже радуйся, Тебе присно привношаем, с симиже имени.

Ин, ирмос тойже:

Ирмос: Твоя песнословцы Богородице, * живый и независтный источниче, * лик себе совокупльшия, духовно утверди, * в божественней Твоей славе * венцев славы сподоби.

Кую Ти достойную похвалу наше принесет конечное неможение? Яко явлением пречистыя Твоя божественныя иконы, независтныя источники целебныя источаеши, верно, прибегающим к Тебе рабом Твоим.

Божественныя Твоя иконы святое явление, Богородице Дево, яко светозарное возсия нам солнце, преславных чудес лучи пушающи, тьмы лютых обстояний отгоняющи, священными Твоими, Владычице, предстательствы.

Исполнила еси благодати иногда первописанную Твою икону, Госпоже Дево Богородице: и ныне таже благодать истинствует сиянием веры чудес, яко тоя ради первописанныя, ко спасению верно к Тебе по Бозе прибегающим.

Поклоняемся, Богородице, Твоему пречистому образу, и пресладкому Твоему Младенцу, Превечному и незаходимому Свету Христу, Имже спасла еси от лютых зол, и тления смертнаго все человеческое естество.

Катавасия: Твоя песнословцы Богородице, * живый и независтный источниче, * лик себе совокупльшия, духовно утверди, * в божественней Твоей славе * венцев славы сподоби.

Седален, глас 8:

Подобен: Премудрости:

Божественнии Слова апостоли, * Евангелиа Христова велегласнии вселенныя блавестницы, * божественную церковь создавше в пресвятое Твое, * имя Богородице, и к Тебе, Госпоже, * приходят, моляще Тя приити на тоя освящение. * Ты же, о Богомати, рекла еси: * идите с миром, и аз с вами тамо есмь. * Они же шедше обретают тамо * на стене церкви Твоего, Владычице, образа подобие, * Божественною писано силою шаровными подобии, * и видевши поклонишася Ти, * и прославиша Бога. * С нимиже и мы божественней Твоей поклоняемся иконе, * просяще от Тебе великия милости: * даруй согрешений оставление рабом Твоим, едина благословенная.

Слава, и ныне, тойже.

Песнь 4.

Ирмос: Седяй в славе, * на престоле Божества, во облаце легце, * прииде Иисус Пребожественный, * нетленною дланию, и спасе зовущия: * слава, Христе, силе Твоей.

Радуйся, чудо чудес, Одигитрие Владычице. Радуйся, всех радости градов и весей, непобедимое христианское в бедах хранилище, и предградие, и на враги побеждение.

Радуйся, радуйся царей православных похвало, и христоробивых воинств, покров пребываеши всех Царице. Радуйся, Одигитрие, прибежище всем нам и утверждение.

Радуйся, всем скорое в бедах избавление. Радуйся, готовое всем скорбящим утешение. Радуйся, всепетая. Радуйся, Одигитрие всеблагословенная, всем немощным исцелительнице.

Радуйся, Еяже величия вся тварь славити убо спешит по достоянию, но не возмощает, Одигитрие, и сего ради зовет Ти: радуйся, Владычице, боговместимое жилище.

Ин, ирмос тойже:

Ирмос: Седяй в славе, * на престоле Божества, во облаце легце, * прииде Иисус Пребожественный, * нетленною дланию, и спасе зовущия: * слава, Христе, силе Твоей.

Почтим людие Чистыя в чистоте икону Девы Богородицы, и Тоя Божественнаго Младенца Христа Бога нашего, и лобызаем и прославляем со страхом и трепетом: почитаем бо икону благочестно, паче же почитаем Самую тую сущую Чистую Богоматерь.

Давид божественный и чудный пророк издалеча провидя, глагола: лицу Твоему помолятся богатии людие. Мы же вернии покланяемся, и лобызаем честную икону, душами купно и телесы освящающесея.

Евангелиа Христова богогласный писатель Лука, Божиим мановением всенепорочный Твой нарисует образ Богородице, и Младенца Превечнаго на руках Твоих вообразив: к немуже притекающия напастей и бед избавляеши, и вся покрываеши, и спасаеши Твоею милостию.

Ты еси похвало и венец святым всем, о Царице! Ты упование наше и помощнице по Бозе, и на Тя надежду спасения нашего возложихом вси. Тебе молимся яко Божии Матери: одожди грешным рабом Твоим, богатыя Твоя душеспасительныя милости.

Катавасия: Седяй в славе, * на престоле Божества, во облаце легце, * прииде Иисус Пребожественный, * нетленною дланию, и спасе зовущия: * слава, Христе, силе Твоей.

Песнь 5.

Ирмос: Ужасошася всяческая * о божественней славе Твоей: * Ты бо Неискусобрачная Дево, * имела еси во утробе над всеми Бога, * и родила еси Безлетнаго Сына, * всем воспевающим Тя * мир подавающая.

Благостыни бездно и щедротам еси, радуйся Одигитрие Девице: радуйся, всем радость творящи верным. О радуйся, сущим в бедах, скорбящим пребыстрая заступнице!

Радости от исполнения величия чудес Твоих зряще исполняемся вси, не зрящи, слышаще же вернии: темже радуйся Тебе присно всюду, и вси, Одигитрие, поем.

Христа Бога нашего, о радуйся Одигитрие, жилище, и дом неизреченней и пребожественней Дево славе Его! О радуйся, палато преукрашенная! Радуйся граде одушевленный, присноцарствующий!

Радость неоскудную Тя разсмотрим, яко море, Отроковице, Одигитрие Девице, радующесея вси, радуйся, вопием Ти: и поюще, Божественных даров невидимо присно от Тебе ожидаем.

Ин. ирмос тойже:

Ирмос: Ужасошася всяческая * о божественней славе Твоей: * Ты бо Неискусобрачная Дево, * имела еси во утробе над всеми Бога, * и родила еси Безлетнаго Сына, * всем воспевающим Тя * мир подавающая.

Всяко Пречистая существо воспети недоумет Тя, паче бо горних умов превозвысилася еси, рождши неприступнаго и страшнаго Всецаря, и Бога: но яко милостива, и скорая человеком помощница, вонми молению раб Твоих, и даруй Твою помощь.

Идеже осенит благодать Твоя, Богородице, страхом исчезают демоны, и разрушается злокозненное тех мечтание, бегают дуси темнии, радуется же верных все множество, Тебе песнь хвальну от сердца вопиюще: радуйся, божественный покрове душ наших.

Безочесным сладкое зрение дается, глухим слышание, немым благоглаголанье, хромым хождение, прокаженным очищение, демонствуемым целомудрие, и в болезнях сущим различных исцеление, осенением пречестыя Твоя, Богородице, иконы.

Не умолчим никогдаже Богородице, псалмы и песньми воспевати величия Твоя, обрадованная: Бога бо воистинну воплотившагося родила еси, во спасение наше всемирное, и избавление.

Катавасия: Ужасошася всяческая * о божественной славе Твоей: * Ты бо Неискусобрачная Дево, * имела еси во утробе над всеми Бога, * и родила еси Безлетнаго Сына, * всем воспевающим Тя * мир подавающая.

Песнь 6.

Ирмос: Божественное сие и всечестное * совершающе празднество * богومудрии Богоматере, * приидите руками восплецим, * от Нея рождшагося Бога славим.

Христа Чистая приемлющи, глас еже радуйся, Одигитрие Девице, слышала еси: Егоже неизреченно рождши, и радуйся, от всех слышиши всегда.

Радости вся исполнила еси, вышняя и нижняя Ты совокупила еси, Одигитрие. Темже радостно и согласно ныне, небо и вся земля зовет Ти.

Вдовам, о радуйся Всепетая, и всем сирым Одигитрие, утешение. Радуйся, всем источающи нищим богатство неистоцимое!

Злата всякаго блистаема, и утра солнечнаго светлейши, жилище Христово, радуйся Одигитрие, радуйся Девице, радуйся Невесто невестная.

Ин, ирмос тойже:

Ирмос: Божественное сие и всечестное * совершающе празднество * богумудрии Богоматере, * приидите руками восплецим, * от Нея рождшагося Бога славим.

Божественнаго Твоего Рождества Дево Госпоже, пребогатая благодать, юже древле изглашением предала еси пречестому Твоему образу, неоскудне действовати великая же и преславная, во спасение на Тя надеющимся.

Идеже прославляется святое имя обрадованная Богородицы, тамо всяческих благих источники проливаются: приидите в чистоте человецы, се бо явление божественная Девы иконы, сказует Царицы пришествие, во спасение всех верных.

Целения болезней, отгнание же страстей, и душепитательное спасение, грехов прощение, и вечное избавление, от пречистыя Твоя иконы, Владычице, верно приходяще приемлем, Богомати всенепорочная.

К Тебе, Госпоже, прибегают роди правоверных, просят великия милости, и приемлют неоскудно сущии в недужех исцеление, в страстех пременение, в печалех утешение. Источи и мне, Владычице каплю душеспасительную, да со всеми и аз пою Твое величие.

Катавасия: **Божественное сие и всечестное * совершающе празднество * богومудрии Богоматере, * приидите руками восплецим, * от Нея рождшагося Бога славим.**

Кондак, глас 8:

Подобен: Взбранной:

Притецем людие к тихому сему и доброму пристанищу, * скорой помощнице, готовому и теплomu спасению, * покрову Девы. Ускорим на молитву и потщимся на покаяние: * источает бо нам неоскудныя милости * Пречистая Богородица, предваряет на помощь, * и избавляет от великих бед и зол, * благонравныя и богобоящияся рабы Своя.

Икос: **Смысл** очистивше и ум, притецем к Богородице, светло песньми ублажающе Ю, и пречистую икону Ея прославляем и чтим, и припадающе покланяемся яко Самой сущей Оной: честь бо иконы на первообразное восходит, и почитай и покланяйся ей, почитает самое первообразное, якоже божественнии отцы рекоша. И аще кто не чтит Пресвятыя Богородицы, и не покланяется иконе Ея, анафема да будет: посрамляет бо и погубляет не чтущия Ю: избавляет же от великих бед и зол, благонравныя и богобоящияся рабы Своя.

Песнь 7.

Ирмос: **Не послужиша твари богумудрии * паче Создавшаго, * но огненное прещение мужески поправше, * радовахуся поюще: * препетый отцев Господь и Бог благословен еси.**

Радуйся, радуйся Богородице Одигитрие, всех и всегда наставляющи верных, шествовати ко всякому пути спасительному, радуйся Владычице, Тобою бо присно избавляемся настоящия варварския беды.

Радуйся, радуйся Одигитрие, бдящи и молящися о нас к Богу, и всякия злобы ходатайством Твоим всяческих скорбей, Богородительнице, всех людей избавляющи.

Радуйся, радуйся Пресвятая Одигитрие, Яже прошения наша к пользе нам исполняющи, и хотящи всем присно всегда любодружное благое единство, спешное же во изыщных.

Радуйся, радуйся кораблем Одигитрие, нужно плавающим, избавляющи верных, и всем избавление от всякия скорби, и недуги пестротныя и медленныя разрешающи вскоре.

Ин, ирмос тойже:

Ирмос: **Не послужиша твари богумудрии * паче Создавшаго, * но огненное прещение мужески поправше, * радовахуся поюще: * препетый отцев Господь и Бог благословен еси.**

Приидите, почерпем отпущение от неистощимаго источника, точащаго святыню Пречистыя Девы, и Тоя Пречистаго Младенца Божия Слова, нас ради

вочеловечшагося, к Немуже возопиим: Творче Избавителю, препрославленный со Отцем и Духом, Боже благословен еси.

Неусыпную, Чистая, и богоприятную имущи молитву, и непреодолеемую державу крепости, врагов наших дерзость, яже на ны разори, и выя их под нозе верному императору нашему низложи, да возвеселимся о Тебе раби, Сыну Твоему вопиюще: отец наших Боже, благословен еси.

Радуемся и веселимся, вернии людие, чудному явлению иконы Пречистыя Владычицы Богородицы: река бо явися неисчерпаема, целебную воду точащи, слепым бо видети дает, и глухим слышание, хромым хождение, и всем сущим в недужех безмездное исцеление.

Неиспытана глубина, неведомо таинство, непостижимь образ, Дево, зачатия Твоего, зачатие без семене, без мужа рождество. Безплотный воплотися, Превечный младенствует, Сын Божий Сын Тебе Девы бывает, Емуже вопием: Боже, благословен еси.

Катавасия: Не послужиша твари богомудрии * паче Создавшаго, * но огненное прещение мужески поправше, * радовахуся поюще: * препетый отцев Господь и Бог благословен еси.

Песнь 8.

Ирмос: Отроки благочестивыя в пещи, * Рождество Богородичо спасло есть, * тогда убо образуемое, * ныне же действуемое, * вселенную всю воздвизает пети Тебе: * Господа пойте дела, * и превозносите Его во вся веки.

Радуйся, всеблагословенная Марие, из Тебе бо всеблагословенный Бог одеяся во всего мя человека. И одеяся соедини Своему Божеству, неизреченным соединением, Дево Одигитрие. Радуйся обрадованная, радости всего мира.

Радуйся, лукавых духов прогонительнице. Радуйся, Богородице Одигитрие. Радуйся, Юже небесная невидимая воинства славословят всегда, и величают яко Матерь Божию бывшую. Радуйся, Яже нижняя сочетавши с вышними.

Радуйся, вся небесныя силы без разсуждения превосходящая. Радуйся, Одигитрие. Радуйся, всякия твари, яко Бога рождающая, господствующи. Ей, Владычице всепетая, радуйся, яко пребываеши Дева Чистая и по рождестве.

Радуйся, женам всем славо, храме преосвященный Бога нашего, радуйся Одигитрие. Радуйся, душеспасительная всей вселенной. Радуйся, покрывающий облаче, небес ширшая. Радуйся, мироположнице, Божественнаго мира полна.

Ин, ирмос тойже:

Ирмос: Отроки благочестивыя в пещи, * Рождество Богородичо спасло есть, * тогда убо образуемое, * ныне же действуемое, * вселенную всю воздвизает пети Тебе: * Господа пойте дела, * и превозносите Его во вся веки.

Ум ангельский и человеческий ужасается, Богородице, како Бога Небеснаго ложеснами объемши воплотила еси? Какое Младенца рождаши, яко Сына на руку носиши? Егоже ужасается тварь, и трепещут горнии престолы, вопиюще непрестанно: Свят, Свят, Свят еси Боже, препетый и превозносимый во веки.

Радуйся, сущая радости всего мира, со архангелом Гавриилом вопием Ти, Богородице: радуйся, вместительнице Невместимаго. Радуйся, благодатная, носило

Божества всего. Радуйся, Адамово воззвание, с Тобою Господь, и Тебе ради с нами спасаю нас. Егоже поем и превозносим во веки.

Корень Иессеев освященный, корень греха нашего исторгнула еси. Жезл Ааронов процветший, жизнодателя цвета израдивши Христа, стамно манноприемная, смерти всю силу сокрушила еси, и в породу жизни возвела еси род человеческий: темже Тя поем добрых виновную.

Ты похвала христианом еси, Владычице, Ты оружие на враги, и стена к Тебе прибегающим. Тя и ныне на помощь призываем Госпоже, не даждь врагом вознестися на люди Твоя, иже Тебе не хвалят, ни Сына Твоего, Богородице, и Твоей иконе не кланяются: сих победы, и души наша спаси.

Катавасия: **Отроки** благочестивыя в печи, * **Рождество** Богородичо спасло есть, * **тогда** убо образуемое, * **ныне** же действуемое, * **вселенную** всю воздвизает пети Тебе: * **Господа** пойте дела, * и превозносите Его во вся веки.

Песнь 9.

Ирмос: **Всяк** земнородный * **да** възыграется **Духом** просвещаемь, * **да** торжествует же **безплотных** умов естество, * **почитающее** священное торжество **Богоматере**, * и **да** вопиет: * **радуйся** всеблаженная * **Богородице**, **Чистая** Приснодево.

Радуйся свеще, Свет не вечерний понесшая, и в Рождестве Твоем многобожия тьму разрушившая, и адовы пропасти избавльшая люди. Радуйся, Одигитрие Богородице, доброт всех предходатаице.

Радуйся земле, из неяже клас прозябши небесный верным, и мира всего душегубнаго глада избави, разумная и одушевленная. О радуйся, винограде, яже грозд животный рождающая, Богородице Чистая Одигитрие!

Радуйся, тайных цветов прекрасный суций раю. Радуйся, Мати Дево, невидимых разум чистотою страннолепно побеждши Богородительнице. Радуйся, Отроковице. Радуйся, Одигитрие, всемирное чудо и слышание.

Лето живота нашего прочее сохрани невредженно, поможением Твоим, Дево Отроковице, и сподоби конец благий получитьи нам воспевающим Тя, и зывающим: радуйся, всеблаженная, Богородице Чистая Одигитрие.

Ин, ирмос тойже:

Ирмос: **Всяк** земнородный * **да** възыграется **Духом** просвещаемь, * **да** торжествует же **безплотных** умов естество, * **почитающее** священное торжество **Богоматере**, * и **да** вопиет: * **радуйся** всеблаженная * **Богородице**, **Чистая** Приснодево.

Тебе твердую помощницу роду человеческому, Богородице Марие, лик пророческий многообразно провозвести, сень святую, небес пространнейшую, скрижаль богописанную, и купину неопалимую, дверь богопроходную, гору же и лестницу, и мост и жезл процветший: мы же воистинну Богородицу Тя величаем.

Тайна глубины Рождества Твоего ум ангельский ужасает, Дево, и пречистая икона демоны прогонит, и лица нечестивых омрачает, и в студию поревает: не терпят бо взирати на силу ея, бегают же и исчезают. Мы же любезно покланяемся и лобызаем, и Тя Богородицу величаем.

Предстательница сущи неоступна к Вышнему Царю, яко имущи матерне дерзновение непостыдно, в мире глубоце православных житие утверди, и благовернаго императора нашего возвыси, и вся полезная даруй всегда рабом Твоим, да Тя, Богородице, величаем.

О всемилостивая христианом помощнице! Не может Тя воспети достойно ум человеческий и ангельский, яко вся твари честнейши, небесных и земных славнейши: всех бо родила еси Творца и Бога. Но о Владычице! Приими милостивно, юже Тебе от сердца возложихом песнь, спасай нас всегда, на Тя бо надеемся.

Катавасия: Всяк земнородный * да възграется Духом просвещаемь, * да торжествует же безплотных умов естество, * почитающее священное торжество Богоматере, * и да вопиет: * радуйся всеблаженная * Богородице, Чистая Приснодево.

Светилен:

Да почтится всепетая Мати Божия, Жизнь сущую рождши Христа Бога нашего, райских дверей отвержение, и всего мира очищение, к животу возведение: Сей есть пророком глаголавый, Тому поклонимся, Богу и Спасу душ наших. **[Дважды.]**

Слава, и ныне:

Приидите, вернии, с чистотою, возвеличим Пречистыя Матере Бога нашего чудную икону, и Божественнаго Младенца Спаса Христа: Егоже яко рождающая на руку носивши, и матерне дерзновение к Нему имущи непрестанно молит за ны и подает рабом Своим богатая милости.

На хвалитех стихиры, на 4, глас 4:

Прославим вернии обрадованную Богородицу, * паче же во устех наших имамы всегда * святое и благословенное имя Ея, * непрестанно прибегающе к пречистой Ея и цельбоносней иконе: * Тою бо обретаем яже на земли вся благая и полезная, * и сущих на воздухе от демонов запинаний избавляемся, * яко Мати рождающая всех Творца, спасает от бед души наша. **[Дважды.]**

Да рыдает вечно сонм злочестивых, * не исповедающих Тя в рождестве Чистую Богородительницу, * и не покланяющихся пречистой Твоей иконе: * вернии же люди радуящиеся исповедуем Тя истинную Деву Богородицу, * яко воистинну родила еси плотию Христа Бога нашего. * Тление Адамово поправа еси, * и от греха весь мир очистила еси, * жизнь безконечную даровала еси, * райский вход верным отверзла еси * Божественным Твоим Рождеством. * Егоже моли, спаситися нам поющим верно Твое таинство.

Радуется убо и веселится неизреченною радостию, * все множество благочестивых: * припадающе же покланяются, * вси благоговеют Божии Матери с боязнию, * благодаряще Сию по Бозе, * яко Бога толиких превеликих благ ходатаицу, * в неже желают ангели приинкнути, * дарова Богородицею верным Христос Бог наш, * имеяй множество щедрот, и великую пребогатую милость.

Слава, и ныне, глас 8:

Святая Твоя и сообразная икона Богородице Дево, * благодатию Твоею пребогатый сущий источник, * кипящий всей подсолнечней, * и светящий всему миру светолучными Святаго Духа сияньми, * и исцелений светлостью. * Ты бо Бога

Слова плотию несказанно родила еси, * от архангела Гавриила сицевая слышавши: * радуйся обрадованная, Господь с Тобою, * и Дух Святой осенит Тя к зачатию. * Такжеже рекла еси к первописанной Твоей иконе, на ту зрящи: * с тою Моя благодать, и слово Твое со властию иконе бысть. * И образ и глас, и сила и дело, * и всяк ум превосходящая Божественная благодать, * спребывающи вечно, * знамения и чудеса непрестанно содевает, * и душеполезное исцеление всем верно приходящим подает, * Твоими Богоматерними непрестанными к Богу молитвами.

Славословие великое. И отпуст.

НА ЛИТУРГИИ,

Блаженни,

Кую Ти достойную похвалу наше принесет конечное неможение? Яко явлением пречистыя Твоя божественныя иконы, независтныя источники целебныя источаеши, верно, прибегающим к Тебе рабом Твоим.

Божественныя Твоя иконы святое явление, Богородице Дево, яко светозарное возсия нам солнце, преславных чудес лучи пуцающи, тьмы лютых обстояний отгоняющи, священными Твоими, Владычице, предстательствы.

Исполнила еси благодати иногда первописанную Твою икону, Госпоже Дево Богородице: и ныне таже благодать истинствует сиянием веры чудес, яко тоя ради первописанныя, ко спасению верно к Тебе по Бозе прибегающим.

Поклоняемся, Богородице, Твоему пречистому образу, и пресладкому Твоему Младенцу, Превечному и незаходимому Свету Христу, Имже спасла еси от лютых зол, и тления смертнаго все человеческое естество.

Божественнаго Твоего Рождества Дево Госпоже, пребогатая благодать, юже древле изглашением предала еси пречестому Твоему образу, неоскудне действовати великая же и преславная, во спасение на Тя надеющимся.

Идеже прославляется святое имя обрадованныя Богородицы, тамо всяческих благих источники проливаются: приидите в чистоте человецы, се бо явление божественныя Девы иконы, сказует Царицы пришествие, во спасение всех верных.

Слава: Целения болезней, отгнание же страстей, и душепитательное спасение, грехов прощение, и вечное избавление, от пречистыя Твоя иконы, Владычице, верно приходяще приемлем, Богомати всенепорочная.

И ныне: **К** Тебе, Госпоже, прибегают роди правоверных, просят великия милости, и приемлют неоскудно суции в недужех исцеление, в страстех пременение, в печалех утешение. Источи и мне, Владычице каплю душеспасительную, да со всеми и аз пою Твое величие.

Тропарь, глас 4:

Заступнице усердная, Мати Господа Вышняго, * за всех молиши Сына Твоего Христа Бога нашего, * и всем твориши спастися, * в державный Твой покров прибегающим. * Всех нас заступи о Госпоже Царице и Владычице, * иже в напастех и скорбех, * и в болезнях обремененных грехи многими, * предстоящих и молящихся Тебе умиленною душею, * и сокрушенным сердцем, * пред пречистым Твоим образом со слезами, * и невозвратно надежду имущих на Тя избавления всех зол, всем полезная даруй, * и вся спаси Богородице Дево: * Ты бо еси божественный покров рабом Твоим.

Кондак, глас 8:

Притецем людие к тихому сему и доброму пристанищу, * скорой помощнице, готовому и теплomu спасению, * покрову Девы. Ускорим на молитву и потщимся на покаяние: * источает бо нам неоскудныя милости * Пречистая Богородица, предваряет на помощь, * и избавляет от великих бед и зол, * благонравныя и богобоящияся рабы Своя.

Прокимен, глас 3, песнь Богородицы:

Прокимен: Величит душа Моя Господа, * и возрадовася дух Мой о Бозе Спасе Моем.

Стих: Яко призре на смирение рабы Своея, се бо отныне ублажат Мя вси роди.

Апостол ко евреем, зачало 240.

Братие, сие да мудрствуется в вас, еже и во Христе Иисусе, Иже во образе Божии сый, не восхищением непщева быти равен Богу. Но Себе умалил, зрак раба приим, в подобии человечестем быв, и образом обретесе якоже человек. Смирил Себе, послушав быв даже до смерти, смерти же крестныя. Темже и Бог Его превознесе и дарова Ему имя, еже паче всякаго имене, да о имени Иисусове всяко колено поклонится небесных и земных и преисподних, и всяк язык исповестъ, яко Господь Иисус Христос в славу Бога Отца.

Аллилуиа, глас 8: Слыши, Дщи, и виждь, и приклони ухо Твое.

Стих: Лицу Твоему помолятся богатии людстии.

Евангелие Луки, зачало 54.

Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешися и молвиши о мнозе. Едино же есть на потребу. Мария же благу часть избра, яже не отымется от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и хранящии е.

Причастен: Чашу спасения прииму, и имя Господне призову.

На трапезе утешение братии. Аще ли будет праздник сей в среду или в пяток: разрешаем точию на рыбу и вино. Аще ли в понедельник: миряне разрешают на мясо, и сыры и яйца: Монаси же точию на рыбу и вино.